

HEBRE Pê Chyáng Hun Kat é Laiká (Hebrews)

*Garai Yhangzo Gi, Maumang Lagyô Pê Htoq Je
Gyaú É Hkyô*

¹ Laí ló bê ipyat pé má, Garai Gasang gi, nga-nhùng é íchýí íwâ pé lé myiqhtoí pé đông alhîng lîng eq adông đông mai dâng nyo wú bê nghut lê.

² Nghut kôlhang, ló htâng é buinyì shí pé má, Yhang gi, Yhâng Zo đông mai nga-nhúng lé dang nyô bê nghut rî; Yhang gi, lhunglhang lé sîng sũ dut râ matú haú Zo lé masat to mù, Zo đông mai, nyì mi-nyì, joq mijoq lé hpan to bê nghut rî.

³ Haú Zo gi, Garai Gasâng é hpungwup shingkang duqbó é hkyô eq Yhâng é gunghkyâng isâm roq nghut nyì mù, lhunglhang lé Yhâng é a-tsam byîng é dâng eq zuí zîng tô rî. Yhang gi, yubak mara lé lhoq sân-yúng é hkyô lé ban kut é htâng, mauhkûng htoq má Hkikhkam dik Sũ Garai Gasâng é loqyo hkyam má zung to bê nghut rî.

⁴ Haú mù luí, Yhang gi, maumang lagyô pê é myîng htoq gyaú é myîng lé wó sing yù bê nghut é eq rajung za, yhangmoq htoq je riyhang gyaú sũ dut bê nghut rî.

⁵ Hkâsu mù gâ le, Garai Gasang gi,
"Nàng gi, Ngá Zo nghut rî. Hkû-nyí, Ngò gi, Náng
Wa dut bê nghut lê."[☆]
ga le, dum,

[☆] 1:5 Hkya-on 2:7

"Ngò gi, Yhâng Wa dut râ nghut mù, Yhang gi, Ngá
 Zo dut râ nghut lê."✠
 ga le, maumang lagyo hká yuq lé hkâ-nhám wá taí
 wú é nghut lê lú?

⁶ Dum, Garai Gasang gi, Yhâng é zomún lé mingkan
 shut nhang hâng kat é hkûn,
 "Ngá é maumang lagyô pé banshoq gi, Yhang lé
 noqkuq kó sháng gaq."✠
 ga taí rì.

⁷ Maumâng pé eq séng luí Garai Gasang taí é má,
 "Yhang gi, Yhâng é maumang lagyô pé lé lai su dut
 nhâng mù, Yhâng é dui-nhâng zoshâng wui
 lé, myishâm pé su dut nhang é nghut rì."✠
 gâ rì.

⁸ Nghut kôhang, haû Zo eq séng luí, Yhang gi,
 "Garai Gasang ê, Náng é hkohkâm-tanghkuq gi, pyat
 dedu ahtum abyuq gîng nyi mù,
 Náng é dingmán hkyô gi, Náng é mingdán lé
 uphkan é hkyô dut râ nghut lê.

⁹ Nàng gi, dingmán hkyô lé chyitdap bê nghut mù,
 agè ashop é hkyô lé a ngui byuq lô é nghut
 lê.

Haû mù luí, Garai Gasang, náng é Garai
 Gasang gi, Nang lé, gabú nhang é xû but byí
 é đông, Náng é luzúm wui htoq je lhoq gyaú
 to bê nghut rì."✠

ga taí rì.

¹⁰ Hau htoq agó, Yhang gi,
 "Yhumsîng ê, Nàng gi, a-nham sâng-hi má myidàm
 é apûn awang lé hì tô é nghut mù,
 mauhkûng pé gi, Náng é loqmú chyat nghut rì.

✠ 1:5 2 Sam 7:14 ✠ 1:6 Tarâ Pun 32:43 ✠ 1:7 Hkya-on 104:4

✠ 1:9 Hkya-on 45:6-7

¹¹ Haú pé gi, htên byoq byuq râ nghut lhê; nghut kôlhang, nàng gi, ru gîng nyî râ nghut lhê; haú pé banshoq gi, mebu su xau byuq râ nghut lhê.

¹² Nàng gi, haú pé lé, bumó lé su dîng yup râ nghut lhê; Nàng gi, haú pé lé, mebu su htaî pyám râ nghut lhê.

Nghut kôlhang, Nàng gi, rajung za ru gîng nyî râ nghut mù, Náng é zanwut pé gi, hkâ-nhám le htûm râ a nghut."☆

ga le taî ri.

¹³ Garai Gasang gi,

"Ngò, náng é gye pé lé, náng é hkyî nang tanghkuq kut pyám byî é hkyîng jé shoq,

Ngá é loqyo hkyam shut zung nyî shi aq."☆

ga maumang lagyo hká yuq lé hkâ-nhám wá taî wú é lú?

¹⁴ Maumâng pé banshoq gi, hkyi yù hkyô lé hkam yù râ nghut é bang lé dojaú râ matú, nhang kat huí é mù wùn woi-nyí pé chyat za nghut akô, a nghut kó lú?

2

Sadiq Byî É Hkyô

¹ Haú mù luí, nga-nhúng gi, châng nghoq ló byuq é a hui zo sháng gaq, haú nga-nhúng wó gyô yu to bê hkyô lé je riyhang rago châng nyî râ dut lhê.

² Hkâsu mù gâ le, maumang lagyo pê eq taí bê mungdang gi, gîng nyî mù, shut shaî lu laí é hkyô eq jîno a gyô é hkyô hkanmó kut é sù gi, yhumsîng eq gîng é mara dam byî é hui zo kô é nghut le gi,

³ nga-nhúng gi, haû-í yhang gyaú é hkyi yù hkyô lé haî su a ngâm kut é nghut jâng, nga-nhúng hkâsu wó hfang lut râ lú? Hkyi yù hkyô haû gi, haû Yhumsing èq hí taî pyo htoq é nghut mù, Yhâng chyáng mai wó gyô yu é bang gi, haû hkyô têng é lé, ngamoq chyáng saksé shit bekô nghut ri.

⁴ Garai Gasang le, kumlhá pé, mauhpo muzó pé, laklaí kumlhá myo myo eq, Yhang ô nau é eq rajung za Chyoiyúng Woi-nyí chyunghuq pé lé gâm byî é đông mai, haû hkyô lé saksé shit bê nghut ri.

Hkyi Yù Hkyô Hpóng Byi Sû

⁵ Garai Gasang gi, maumang lagyô pé lé, ngamoq taî nyi é jé lô râ mingkan lé, uphkâng nhâng râ a nghut.

⁶ Rayuq yuq mai, rawò má saksé hkâm tô é gi, "Byù gi, haî wá nghut mù, Nàng, yhang lé bûn nyi lhê lú?

Byu Yhangzo gi, haî wá nghut mù, Nàng, yhang lé wú gôn nyi lhê lú?

⁷ Nàng gi, yhang lé, maumang lagyô pê htoq ratsuí lhoq nyhum to bê nghut ri.

Nàng gi, yhang lé, hpungwup shingkang eq aróng bò nhâng mù,

⁸ jung hkgangmó lé, yhâng é hkyiwa ô má tô to bê nghut ri."☆

gâ ri. Jung hkgangmó lé yhâng é a-ô má tô to bê gâ é gi, Garai Gasang, haî lhang a myhit to loshoq yhang uphkâng é a-ô má tô to bê nghut é lé gâ lhê. Nghut kôlhang, yhang é a-ô má tô tô é jung hkgangmó lé, ahkuí, nga-nhúng a myàng shî é za nghut lhê.

⁹ Nghut kôlhang, nga-nhúng gi, maumang lagyô pê htoq ratsuí zo lhoq nyhûm huí é sủ Yesuq lé myang é nghut lhê. Yhang gi, Garai Gasâng jeju mai, yuq hkanmó é matú shí hkám byí é huí zo sháng gaq ga, shí-nò jamjau hkyô lé hkám zo bê nghut é yanmai, ahkuí, Yhang lé hpungwup shingkanq eq aróng bò nhâng bê nghut rì.

¹⁰ Zo wuí myo myo lé hpungwup shingkanq wó hkan yù nhâng sháng gaq ga, jung hkanmó lé Yhang é matú chyat eq Yhang đông mai chyat joq nyí nhang é Garai Gasang gi, wuîhke jamjau huí nhang é đông, yhangmoq é hkyi yù Sủ lé lhoq gumjup byi rả matú htuk ảng nyí rì.

¹¹ Hủ byu pé lé chyoiyúng nhang é Sủ eq lhoq chyoiyúng huí é bang gi, ikun ralhũm za mả é bang chyat nghut lhê. Hủ mù, Yesuq gi, yhangmoq lé, gumang wuì nghũ rả lé a hoq é nghut lhê.

¹² "Ngò gi, Nảng myíng lé, Ngả gumang wuì chyảng tải pyô rả nghut lhê;

Ngò gi, shiwa hpông é myoq hí má, Nang lé hky-a-on mahkôn hkôn rả nghut lhê."☆
ga, Yhang tải rì.

¹³ Yhang gi,

"Ngò gi, Yhang lé lumhkau nyí rả nghut lhê."☆

ga le dum tải rì. Hủ htoq agó,

"Ngò gi, Garai Gasang ngo lé byí é zoshâng wuì eq shí má nyí nyí lhê."☆

ga, Yhang dum tải rì.

¹⁴ Hủ zoshâng wuì gi, sui sho eq nghut é yanmai, Yhang le, yhangmoq é xângzo gùng bo hkan yù bê nghut rì. Hủ é yanmai, Yhang gi, Yhâng é

shî-nò hkyô đông mai, shî-nò hkyô é a-tsam lé zuí zìng é sũ nghut é nat Tsadán lé wó lhoq htên pyám râ eq,

¹⁵ yhangmoq é shî-nò hkyô lé gyuq é èq, yhangmoq é asak gón lé jùn đông zuí zìng to huí é bang lé, wó lhoq lhut râ nghut lhê.

¹⁶ Gè gè yhang, Yhang gi, maumang lagyô pé lé garúm é a nghut é za, Abraham é awut ashín pé lé garúm é sheq ru nghut lhê.

¹⁷ Haû nghut é yanmai, Yhang gi, Garai Gasang lé dojaú é má shogyo nhikmyín é eq lhumzuí é hkyangjong mó wó dut râ eq, byu pé é yubak marâ é matú shîhtaí gunglik hkungga wó kut râ matú, hkyô hkangmó má Yhâng é gumang wuì eq dù shoq kut é huì râ dut é nghut lhê.

¹⁸ Yhang gi, gunglaú huí é hkûn, Yhânggùng yhang jamjau huì zo bê nghut é yanmai, gunglaú huì nyi é bang lé wó garúm yu é nghut lhê.

3

Yesuq Gi, Mosheq Htoq Gyaú É Hkyô

¹ Haû mù luí, mauhkûng mai wut yù huí é, chyoiyúng é gumang wuì ê, lagyo eq hkyangjong mó nghũ nga-nhúng yín yu é Yesuq é hkyô lé rago myit wú keq.

² Mosheq, Garai Gasâng é yhũm gón má lhumzuí é su, Yesuq le, Yhang lé masat yù sũ Garai Gasâng chyáng lhumzui sũ dut bê nghut ri.*

* **3:2** Bun zo shî eq bun zo 5, 6 lhum mâ é *Garai Gasâng é yhũm gâ é gi*, Garai Gasâng é byu pé lé gâ é nghut lhê.

³ Yhûm kut sù gi, yhûm htoq je gyaú é aróng lé wó é su, Mosheq htoq, Yesuq gi, je gyaú é aróng lé wó gíng é lé myàng ri.

⁴ Hkâsu mù gâ le, yhûm hkangmó gi, rayuq yuq èq saí é chyat nghut ri. Nghut kôhang, Garai Gasang gi, jung hkangmó lé saí é sù nghut lhê.

⁵ Mosheq gi, Garai Gasâng é yhûm gón má dui-nhâng zoshâng rayuq đông lhumzui mù, Garai Gasang táí râ nghut é lé saksé hkám bê nghut ri.

⁶ Nghut kôhang, Hkrisduq gi, lhumzui é zo rayuq đông Garai Gasâng é yhûm lé up ri. Nga-nhúng kúm gi, nga-nhúng lé wám é myit bò nhang é hkyô eq nga-nhúng gumrong nyi é myoqbyu hkyô lé myhik zing nyi é nghut jáng, Yhâng é yhûm nghut nyi bê.

A Lumjǎng Bang Lé Sidiq Byǎ É Hkyô

⁷ Haû mù luí, haû Chyoiyúng Woi-nyí taí é eq rajung za,

"Hkû-nyí, nungmoq gi, Yhâng é danghtê lé wó gyo kô é nghut jáng,

⁸ yoso má Yhang lé chyâm kô é u lé, gumlau toq é hkûn nungmoq é íchýí íwâ pé kut kô é su, nungmoq é i-myit lé hkâlhoq htan to kó.

⁹ Nungmoq é íchýí íwâ pé gi, myi xê zàn yhang Ngò kut é muzó lé myàng kôle, yoso haú má Ngo lé chyam lik bekô nghut ri.

¹⁰ Haû nghut é yanmai, Ngò gi, ipyat haû lé nhikjum yo mù,

'Yhangmoq é myit nhiklhum gi, hkâ-nhám le hkyô nghoq byuq akô;
yhangmoq gi, ngá é hkyô pé lé a sé kômù
nghut ri.' nghú taí é nghut lhê.

¹¹ Haû mù, 'Ngá é bánno jowò má yhangmoq hkâ-nhám le wó wâng kó râ a nghut.' nghû, Ngò, nhikjum yô é eq dakâm dang tái bê nghut lhê."☆

gâ ri.

¹² Gumang wuì ê, nungmoq mâ é ó yuq le, haû rû dui nyi é Garai Gasâng chyáng mai, lhing taû lô byuq sê é, yubak mara byíng é, a lumjíng é i-myt a bò sháng gaq, sidiq nyi keq.

¹³ Nungmoq gi, ó yuq le, yubak marâ é mhaú zô é hkyo èq i-myt lhoq htan pyâm é a hui kó sháng gaq, "hkû-nyí" nghû ru wó tái nyi nyi gi, nyí wuì, rayuq eq rayuq myit wum byî lhûm nyi keq.

¹⁴ Nga-nhúng gi, sâng-hi mai wó to bê myit lùm hkyô lé, lô htáng shoq zuí gíng nyi é nghut jáng, Hkrisduq eq chôm zùm yap nyi é bang dut bê nghut ri.

¹⁵ Haû gi,
"Hkû-nyí, nungmoq, Yhâng é danghtê lé wó gyô é nghut jáng, gumlau toq é hkûn, nungmoq é íchýí íwâ pé kut kô é su, nungmoq é i-myt lé hkâlhoq htan to kó."☆

ga tái é eq rajung za nghut ri.

¹⁶ Wó gyô yù mù, gumlau toq é bang gi, ô pé nghut akô lú? Haú bang banshoq gi, Egutuq ming mai Mosheq èq shuí htoq lo é bang nghut bum lhê, a nghut kó lú?

¹⁷ Myi xê zàn yhang Garai Gasang lé nhikjum yó nhang é bang gi, ô pé nghut akô lú? Haú bang gi, mara kut shut mù, yoso má shi leq byuq é bang nghut bum lhê, a nghut kó lú?

¹⁸ Jìno a gyô bùm kô é nghut jáng, Yhâng é bánno jowò má yhangmoq hkâ-nhám le wó wâng kó râ a nghut ga, Garai Gasâng èq dakam é bang gi, ô pé nghut akô lúh?

¹⁹ Haû mù, yhangmoq a lumjìng kô é yanmai, a wó wâng kô é lé, nga-nhúng myang é nghut lhê.

4

Garai Gasâng É Byu Pé É Matú Bánno Buinyì Đông Nghut É Bánno Jowò

¹ Haû nghut mù luì, Garai Gasâng é bánno jowò má wàng râ danggidiq ru gîng nyì ashî nghut é yanmai, nungmoq mâ é ó yuq le, haû má a hkyit hkáp é a dut râ matú, nga-nhúng sidiq nyì sháng.

² Hkâsu mù gâ le, yhangmoq lé gabú danglù haû hko kyo bê su, ngamoq lé le hko kyo bê nghut lhê; nghut kôlhang, yhangmoq wó gyô é mungdang gi, yhangmoq é matú akyû a bò, haû mù gâ le, haû wó gyô é bang gi, lumjìng myit mai a lhom hap yù kô é yanmai nghut ri.

³ Nga-nhúng lumjìng bê bang za, bánno jowò haû má wó wang é nghut lhê. Haû hkyô gi,

"Haû mù, 'Ngá é bánno jowò má yhangmoq hkâ-nhám le wó wâng ko râ a nghut.' nghû, Ngò, nhikjum yô é èq dakâm dang taí bê nghut lhê."☆

ga Garai Gasang taí bê eq rajung za dut é nghut ri. Nghut kôlhang, Yhâng é muzó gi, mau htoq xâng hkun mai ban kut to bê nghut lhê.

⁴ Hkâsu mù gâ le, "Garai Gasang gi, nyhit nyí nghû râ buinyì má Yhâng é muzó banshoq mai bánno bê

nghut ri."☆ gâ é dang pé má, haû nyhit nyí ngû rô buinyì eq séng é hkyô lé rawò má Yhang taí tô ri.

⁵ Bánno jowò joq é eq séng luí, Yhang dum taí tô é gi, "Ngá é bánno jowò má yhangmoq hkâ-nhám le wó wâng kó rô a nghut."☆ gâ ri.

⁶ Bánno jowò haú má wàng rô bang ra-am nyí é danggidiq joq tô ashî nghut ri; hí hkûn, gabú danglù haú wó gyô wú bê bang kúm gi, yhangmoq jìno a gyo kô é yanmai, a wàng kô é nghut lhê.

⁷ Haú mù luí,
"Hkû-nyí, nungmoq, Yhâng é danghtê lé wó gyo kô é nghut jáng, nungmoq é i-myt lé hkâlhoq htân kó."☆
gâ é lé, ngò hí lé taí bê eq rajung za, Garai Gasang gi, gyai myáng é htâng má Dawiq đông mai taí é hkûn, "Hkû-nyí" gâ é buinyì ra-nyí dum masat to bê nghut ri.

⁸ Hkâsu mù gâ le, yhangmoq lé, Yoshuq èq bánno jowò byi bê ru nghut le gi, Garai Gasang gi, htâng má, gotû buinyì eq séng luí taí rô a nghut lo.

⁹ Haú mù luí, Garai Gasâng é byu pê é matú gi, Bánno buinyì đông nghut é bánno jowò ru joq tô ashî nghut lhê.

¹⁰ Hkâsu mù gâ le, Garai Gasang gi, Yhâng é muzó mai bannô é su, Garai Gasâng é bánno jowò má wàng é sù gi, yhumsing é muzó mai bánno rô nghut lhê.

¹¹ Haú nghut mù, yhangmoq é jìno a gyo hkyo é alik lé cháng mù leqbat é, ó yuq le a bò sháng gaq, nga-nhúng gi, bánno jowò haú má wó wâng shoq, a-tsam bo é í shikut sháng.

¹² Hkâsu mù gà le, Garai Gasâng é mungdang gi, rû dui nyi é eq a-tsam bo é nghut lê. Haû gi, shamsó íshut dap é sham htoq má je htoq é nghut mù, myit nhiklhum eq woi-nyí lé le, wuimyoq pé eq wui-nyún lé le, wó gam hkoq hkyang rot é nghut lê; haû gi, nga-nhúng myit é hkyô pé eq myit sôn é hkyô pé lé wó jéyáng é nghut lê.

¹³ Hpan tô é lhunglhang gi, Garai Gasâng é hí mai wó haq pyâm é haí le a joq é nghut lê. Jung hkgangmó gi, nga-nhúng, jihpán shit ra râ Su é myoq hí má a wó nghop tô é hkyô, de de dut é nghut lê.

Je Gyaú É Hkyangjong Mó Yesuq

¹⁴ Haû mù luí, nga-nhúng gi, Garai Gasâng é Yhangzo Yesuq nghut sù, mauhkúng pê shut hkyang doq ló bê nghut é gyaú é hkyangjong mó lé wó é nghut é yanmai, nga-nhúng yín yu to bê lumjíngh hkyô lé gíng gíng myhik zing nyí sháng.

¹⁵ Hkâsu mù gà le, nga-nhúng gi, nga-nhúng wum nyhôm é hkyô pé lé a sê gyo byí é hkyangjong mó wó é a nghut é za, nga-nhúng su hkyô hkgangmó má gunglaú é huí wú kôlhang mara a bo é sù hkyangjong mó lé sheq wó é ru nghut lê.

¹⁶ Haû mù luí, nga-nhúng gi, shogyo nhikmyîn é hkyô wó yû râ eq, nga-nhúng ra châ é u má nga-nhúng le wó garúm râ jeju lé myang hô sháng gaq, hkyak lum é myit mai Garaî jeju tanghkuq shut chyâng htep ê sháng.

5

¹ Hkyangjong mó yuq hkgangmó gi, byu pê chyáng mai hkyin htoq yû huí é nghut mù, mara

pê é matú, chyunghuq pé eq hkungga pé nhông byi hkyô nghut é, Garai Gasang eq sêng é muzó pé má, yhangmoq é gunglik đông, hkyin masat to hui é bang nghut akô.

² Yhânggùng yhang gi, wum nyhóm hkyo é a-ô má nghut nyi é yanmai, yhang gi, bun a bóng é eq hkyô nghoq ló é bang lé nú-nhâm é đông wó shui-ủ é nghut lhê.

³ Wum nyhóm é yanmai, yhang gi, byu pê é marâ é matú le, yhânggùng yhâng é marâ é matú le, hkungga nhông byi râ dut é nghut lhê.

⁴ Ó yuq le, yhumsing gùng yhumsing aróng haû lé wó yu é a nghut; Arun lé su, Garai Gasang eq wut yu é hui jáng sheq wó é nghut lhê.

⁵ Haû eq rajung za, Hkrisduq le, hkyangjong mó dut ló é hpungwup shingkang lé, Yhânggùng yhang kut yu é a nghut. Garai Gasang sheq, Yhang lé,

"Nàng gi, Ngá Zo nghut ri; Ngò, hkû-nyí Náng Wa dut bê nghut lhê."[☆]

ga taí é nghut lhê.

⁶ Hau htoq agó,

"Nàng gi, Melahkizedek wó é hkyangjong ayá hkyô đông mai ahtum abyuq hkyangjong rayuq nghut nyi ri."[☆]

ga, gó wô má le, Yhang taí to ashî nghut ri.

⁷ Yesuq gi, myidàm htoq má asak dui nyi é buinyi pé má, Yhang lé, shi é mai wó hkyi yù Su chyáng, ngaubyi ngau-nhap eq wut garû é eq, kyûdung é eq dung tôngbán bê nghut mù, Yhâng é hkungga gíng é ap nóng hkyo é yanmai, gyo byí é hui bê nghut ri.

⁸ Yhang gi, Zo rayuq nghut to kôle, Yhang hui zô é wuîhke jamjau hkyô mai jîno gyo hkyô wó mhoq yû bê nghut ri.

⁹ Yhang gi, lhoq gumjup huî é hkûn, Yhang é jîno gyo bang banshoq é matú, ahtum abyuq é hkyi yû hkyo é awang dut byuq bê nghut é eq,

¹⁰ Melahkizedek wó é hkyangjong ayá hkyô đông mai hkyangjong mó dut râ matú, Garai Gasâng eq hkyin masat é hui bê sù nghut ri.

Woi-nyí Má Wáng Ra Bê Hkyô

¹¹ Ngamoq gi, shí hkyô eq séng luî taí râ gyai joq lhê; nghut kôlhang, nungmoq gi, ra lui za a sê gyô é bang nghut kô é yanmai, taí sân kyo wuî ri.

¹² Gè gè ga jáng, ahkui lhê ahkyíng má, nungmoq gi, sará dut gíng bê bang nghut lhê; nghut kôlhang, Garai Gasâng é mungdang mâ é tengmán hkyo é awanglé, rayuq yuq eq nungmoq lé dum taû mhoq byi râ ru dut nyi akô nghut ri. Nungmoq gi, htan é zoshuq râ é bang a nghut, naú wíng râ é bang ru nghut nyi ashí kó myhi-nhung!

¹³ Naú wíng shuq râ é sù ó yuq le, zonú nghut nyi ashí mù, dīngmán é hkyô lé mhoqshit é má a mán shi nghut ri.

¹⁴ Nghut kôlhang, htan é zoshuq gi, ge é hkyô eq agè ashop é hkyô lé wó sê gam hkoq yû shoq, hkâ-nhám le yhumsing gùng yhumsîng lhoq mhân yu nyi é, kô dīng bê bāng é matú ru nghut lhê.

6

¹ Haû mù luî, nga-nhúng gi, Hkrisduq eq sêng é mhoqshit hkyô awang lé tô to mù, myit kô dīng é hkyô shut xoq sô ê sháng. Nga-nhúng gi, shî-nò

hkyô shut shuî jé é muzó mai myit lêng hkyo é,
Garai Gasang lé lumjîng hkyo é,

² baptisma pé, loq ke byi hkyô, shi é mai dum dui
toq hkyô eq ahtum abyuq jéyáng hkyô eq sêng é
mhoqshit hkyo é, apûn awang dum hî nó a ra lô
é nghut lhê.

³ Garai Gasang gyô é nghut jáng, nga-nhúng gi,
myit kô dîng hkyô shut xoq so râ nghut lhê.

⁴ Myoq lhoq bóng é radàm hui bê bang,
mauhkûng chyunghuq lé myang hap yù bê bang,
haû Chyoiyúng Woi-nyí lé chôm hkam yù bê bang,

⁵ Garai Gasâng é mungdâng é gè hkyô eq jé lo nyi
é ipyat é a-tsam pé lé myang chyam wú bê bang,

⁶ yhangmoq hpuq lhik ló byuq é nghut le gi, hká
dông lé myit lêng dum ge wó râ a nghut lo, haî
mù gâ le, yhangmoq gi, Garai Gasâng é Yhangzo
lé dum jén sat pyâm é dut mù, Yhang lé de de rhoi
pyám kô é nghut lhê.

⁷ Yhâng ahtoq má wo gyûn é mau wuî lé shuq yû
mù, yò mù saí bâng é matú akyû bo é hôwa nuqhpyí
lhoq htoq byî é maumyî gi, Garai Gasâng é shimân
jeju myang hap yu é nghut ri.

⁸ Nghut kôlhang, zu gâm eq myoq gàm yuq htoq
nhang é maumyî gi, akyû a bò mù, nhîng pyâm é
hui zo râ lé chiq râ ri. Haû gi, ló htáng má nyhê
hkyô pyâm é hui râ nghut lhê.

⁹ Nghut kôlhang, chyitdap é gumang wuî ê, ng-
amoq gi, haû su nghû taî é nghut kôlhang, nung-
moq é hkyi yù hkyô eq sêng é je ge é jung pé,
nungmoq wó bekô râ nghû hkyak myit lum tô lhê.

¹⁰ Garai Gasang gi, a tara é sù a nghut. Yhang gi,
nungmoq é muzó lé le, Yhâng é byu pé lé nungmoq

garúm bê eq xoq luí garúm nyi é đông, Yhang lé nungmoq chyitdap é myit shit kô é hkyô lé le, a tô-myhi râ nghut lhê.

¹¹ Ngamoq gi, nungmoq é i-myit myoqbyù hkyô wó byíng jup râ matú, nungmoq yuq hkanmó ipyat htum shoq xoq shikut nyi kó râ lé gyai ô nau ri.

¹² Ngamoq gi, nungmoq lagon bang dut byuq râ lé a ô nau é za, Garaí danggidiq byí to bê é lé, lumjíng myit eq myit hîng hkyô đông mai hkan yu é bang su châng kut kó râ lé ô nau é ru nghut lhê.

Garaí Gasâng É Danggidiq Gîng Nyi É Hkyô

¹³ Garaí Gasang gi, Abraham lé danggidiq tô é hkûn, Yhâng htoq gyaú é dakâm myîng lang râ rayuq lháng a nyi é nghut mù, Yhânggùng lé Yhang lang luí dakâm é gi,

¹⁴ "Ngò gi, nang lé teng yhang shimân byi mù, nang lé awut ashín myo myo byi râ nghut lhê."☆ gâ ri.

¹⁵ Haû mù, Abraham gi, myit hîng hîng lánng yu é htâng má, byí tô é danggidiq lé wó yû bê nghut ri.

¹⁶ Byu pé gi, yhangmoq htoq gyaú su é myîng lé lang luí, dakâm kô é eq, yhangmoq dakâm é dang lé saksé kut mù, dang-rháng é hkyô pé banshoq lé lhoq pân pyâm akô nghut ri.

¹⁷ Garaí Gasang gi, Yhang myit hpyit tô é hkâ-nhám le a htaí lhik é hkyô lé, danggidiq byí tô é lé hkan yù râ bâng chyáng san za shit nau ri; haû mù luí, dakâm dang eq lhoq gîng to bê nghut ri.

¹⁸ Garaí Gasang gi, mhaú a ge é yanmai, hkâ-nhám le a htaí lhik é hkyô í hkat nghut é danggidiq

☆ 6:14 Apûn 22:17

eq dakâm dang joq é nghut mù, Yhang haû su kut é gi, nga-nhûng hí má tô to byî é myit myoqbyù hkyô lé myhik zîng râ matú gaû é jowò shut h pang wàng bê bang nga-nhúng lé wum mó byî é dut râ matú nghut lê.

¹⁹ Nga-nhúng gi, myit nhiklhûm é shamtoq goknghe đông myit myoqbyù hkyô haû lé wó é nghut mù, haû gi, gingtîng é eq gaû é hkyô nghut ri. Myit myoqbyù hkyô haû gi, mauhkûng noqkuq yhûm mâ é pân-gyang ahkaû mâ é sân-yúng gok má jé wang é nghut ri.

²⁰ Jowò haû gi, nga-nhûng é akyu é matú, nga-nhûng é hí má wàng byî é sũ Yesuq wang jé é jowò nghut ri. Yhang gi, Melahkizedek wó é hkyangjong ayá hkyô đông mai, ahtum abyuq é hkyangjong mó dut bê nghut ri.

7

Hkyangjong Melahkizedek É Hkyô

¹ Melahkizedek gi, Salem myuq é hkohkâm eq Myhang Htâng é Garai Gasâng é hkyangjong nghut ri. Yhang gi, hkohkâm pé lé sat ûng pyám lui dum taû lo é Abraham lé hui mù, shimân byi bê nghut ri.

² Haû mù, Abraham gi, wó lo é jung hkanmó mâ é, xê gambum mâ é ragambum, yhang lé byi bê nghut ri. Sâng-hi lê é Melahkizedek é myîng lichyúm gi, "dingmán hkyo é hkohkâm" gâ é nghut mù, htâng lê é "Salem é hkohkâm" gâ é gi, "ngu-îngón hkyo é hkohkâm" gâ é nghut lê.

³ Yhâng é înu îwa é hkyô eq byùxik labaû le, hi é buinyî eq asak htûm é hkyô le a kê to nghut

ri. Yhang gi, Garai Gasâng é Yhangzo su, ahtum abyuq hkyangjong ru nghut nyi ri.

⁴ Yhang hkâ-í hkik lhê nghû é lé, myit wú keq. Haû íchýí îwa Abraham lháng gi, wó lo é mâ é xê gambùm mâ é ragambùm, yhang lé byi ri-nhung!

⁵ Hkyangjong dut bang Lewiq é awut ashîn pé gi, yhangmoq é gumang wuì, Abraham mai nyi gyó lo é bang nghut kôle, tarâ má bo é eq rajung za, haú bâng chyáng mai xê gambùm mâ é ragambùm lé hkyui yù râ dut é bang nghut akô.

⁶ Nghut kôlhang, Melahkizedek gi, Lewiq mai gyó lo é amyû a nghut kôle, danggididq pé wó to sù nghut é Abraham chyáng mai xê gambùm mâ é ragambùm hap yù mù, shimân byî ri.

⁷ Shimân byi sù gi, shimân byî é lé hkam yù sù htoq je gyaú sù nghut é lé, ó yuq le úng-áng râ hkyô a joq é nghut lhê.

⁸ Hkyangjong pé eq séng luí ga jang, shi byuq sê é byu eq, xê gambùm mâ é ragambùm lé hkyui yu é nghut lhê; nghut kôlhang, Melahkizedek eq séng luí nghut jáng, asak dui nyi é ga tai pyô byî é huí su èq hkyui yu é nghut lhê.

⁹ Xê gambùm mâ é ragambùm hkyui yù sù, Lewiq lháng gi, Abraham dông mai xê gambùm mâ é ragambùm byi bê nghû wó tai ri.

¹⁰ Haî mù gâ le, Melahkizedek gi, Abraham lé huí é hkûn, Lewiq gi, yhâng é íchýí îkê é gungdu hkaû má ru bo tô ashî nghut ri.

Melahkizedek Eq Dù É Yesuq

¹¹ Haû Lewiq hkyangjong amyû pé é ipyat má, byu pé gi, jep é tarâ lé wó yu bùm kô é nghut mù, hkyangjong ayá haû mai gumjup hkyô wó yu kô

é nghut le gi, haî mù luî, Arun wó é hkyangjong ayá hkyo đông a nghut é za, Melahkizedek wó é hkyangjong ayá hkyo đông lo é sủ gotû hkyangjong rayuq ra shirâ lû?

¹² Hkâsu mù gâ le, hkyangjong amyû htaî é hkûn gi, tarâ le htaî yhang htaî râ dut é nghut lê.

¹³ Haû su nghû taí é hkyô pé eq sêng é Sủ gi, gotû byuhú mâ é sủ nghut mù, byuhú haû mai gi, ó yuq le hkungga gyap má dojaú wú é a nghut.

¹⁴ Hkâsu mù gâ le, nga-nhûng é Yhumsîng gi, Yudaq byuhú mai gyó lo é awut ashín nghut é hkyô, san za nghut nyi ri. Mosheq kúm gi, byuhú haû eq sêng é hkyô má, hkyangjong pé eq sêng luî haî lé a taí é nghut lê.

¹⁵ Melahkizedek eq dù é gotû hkyangjong rayuq pô htoq bê nghû, ngamoq taí bê hkyô gi, je riyhang san za dut bê nghut ri.

¹⁶ Yhang gi, îwa rayuq é awut ashín pé nghut râ lê gâ é tarâ đông hkyangjong rayuq lé dut é a nghut é za, a wó lhoq htên é asak é a-tsam eq rajung za lé dut é ru nghut lê.

¹⁷ Hkâsu mù gâ le,
"Nàng gi, Melahkizedek wó é hkyangjong ayá hkyô
đông mai, ahtum abyuq hkyangjong rayuq
nghut nyi ri."☆

ga Yhang eq sêng luî taí pyo tô é nghut lê.

¹⁸ Haû hí lê é cháng râ tarâ gi, wum nyhôm é eq akyû a bo é yanmai, tô pyám bê nghut lê.

¹⁹ Hkâsu mù gâ le, haû jep é tarâ gi, gumjup hkyô haî a wó kut byî é nghut lê. Haû mù, je ge é myit myoqbyù hkyô lajang byî é nghut luî,

nga-nhúng gi, myit myoqbyù hkyô haû mai Garai Gasâng chyáng wó chyâng htep ê é nghut lhê.

²⁰ Myit myoqbyù hkyô haû gi, dakâm hkyô a bo é a nghut myhi-nhung! Góbang gi, dakâm hkyô a bo é za hkyangjong pé wó dut bekô nghut ri.

²¹ Nghut kôlhang, Yesuq kúm gi,
 "'Nàng gi, ahtum abyuq hkyangjong rayuq nghut lhê.'

ga haû Yhumsîng dakâm bê nghut mù, Yhang myit é hkyô htaí râ a nghut."☆

ga, Yhang eq séng luî Garai Gasang taí é hkûn, dakâm dang haû mai hkyangjong rayuq dut bê nghut ri.

²² Dakâm dang hau é yanmai, Yesuq gi, je ge é dangshikaq é pahkám wò yù sù dut bê nghut ri.

²³ Hkyangjong pé myo myo nyì râ dut é gi, yhang-moq é muzó a wó xoq zui shoq shi byuq hkyô eq hkûm zing pyám kô é yanmai nghut ri.

²⁴ Nghut kôlhang, Yesuq gi, ahtum abyuq dui nyì sù nghut é yanmai, Yhang gi, hkyangjong mù ayang ru zuì nyí râ nghut lhê.

²⁵ Haû mù luî, Yhang gi, Yhang đông mai Garai Gasâng chyáng lé jé é bang lé, hkâ-nhám le wó hkyi yu é nghut lhê; haî mù gâ le, Yhang gi, yhangmoq é matú dúng tôngbán byi nyì râ matú, rû dui nyi é sù nghut lhê.

²⁶ Yesuq gi, chyoiyúng é sù, mara hûn râ hkyô a bo é sù, sân-yúng é sù, yubak dap bang eq rahá a nghut shoq gotû san kut huí é sù, mauhkûng pê ahtoq má lhoq toq lhoq gyaú yu huí é sù nghut

☆ 7:21 Hkya-on 110:4

ri. Haû sũ é hkyangjong mó gi, nga-nhúng râ é lé lajang byi râ htuk ang ri.

²⁷ Nyí nyí bui bui, yhumsing é marâ é matú hí hkungga nhông byi mù, byu pê é mara matú le hkungga nhông byi é gotû hkyangjong mó pé su, Yhang gi, a kut râ é sũ nghut lhê. Yhang gi, Yhânggùng lé Yhang nhông byi é hkûn, yhangmoq é yubak marâ é matú banshoq radàm za hkungga nhông byi pyám bê nghut ri.

²⁸ Hkâsu mù gâ le, haû jep é tarâ gi, wum nyhôm é byu pé lé hkyangjong mó pé dông masat é nghut ri. Nghut kôlhang, Garai Gasang gi, haû jep é tarâ é htâng má lé jé é dakâm dâng eq, Yhâng é Yuqzo lé masat to bê nghut mù, Yhang gi, ahtum abyuq lhoq gumjup hui bê nghut ri.

8

Dangshikaq Asik É Hkyangjong Mó Yesuq

¹ Ngamoq taí nyi é dangkâng gi, shí dông nghut lhê: Nga-nhúng gi, haû sũ é hkyangjong mó lé wó é bang nghut lhê. Yhang gi, mauhkûng htoq má, Hkikhkam dik Sũ Garaî é hkohkâm-tanghkuq é loqyò hkyam shut zùng to mù,

² byu eq saí é a nghut é za, haû Yhumsing eq saí é saksé zúm akying hkaû mâ é, sân-yúng dik gok má dojaú é sũ nghut ri.

³ Hkyangjong mó hkangmó gi, chyunghuq pé eq hkungga pé lé nhông byi râ matú wò hun to huí é chyat nghut lhê. Haû mù luí, hkyangjong mó shí yuq le, rajung jung nhông byi ra râ nghut lhê.

⁴ Yhang gi, mingkan htoq má nyi tô é ru nghut le gi, hkyangjong dut râ a nghut; hkâsu mù gâ le, jep

é tarâ đông ga jang, chyunghuq nhông jaú é byu pé nnyi to gù bẻ nghut lhê.

⁵ Yhangmoq, sân-yúng dik gok má dojaú é hkyô gi, mauhkûng htoq má joq é azông eq wupzo đông nghut ri. Haû nghut é yanmai, Mosheq gi, saksé zúm saí râ nghut é hkûn, "Nang lé, bùm má tân shit é azông eq rajung za jung hkanmó wó saí shoq kut aq."✧ ga sidiq byi huí é nghut lhê.

⁶ Nghut kôlhang, Yesuq, gyoro sô xoq byi é dangshikaq gi, axaû lhum htoq má je gyaú é eq rajung za Yhang hap yu tô é dojaú hkyô gi, yhangmoq é dojaú hkyô htoq má je gyaú é nghut lhê. Haû mù, dangshikaq haû gi, je ge é danggidiq pẻ htoq má awang hi tô é nghut lhê.

⁷ Hkâsu mù gâ le, sângh-lhê é dangshikaq má râ é hkyô haí a bo é ru nghut le gi, gotû ra râ a nghut lo.

⁸ Nghut kôlhang, Garai Gasang gi, byu pẻ chyáng mara bo é myàng mù, taí é gi,
"Haû Israelaq é yhumbyù wuì eq le, Yudaq é yhumbyù wuì eq le,
Ngò, dangshikaq asik to râ ahkyíng jẻ lo nnyi ri ga haû Yhumsing taí pyo ri.

⁹ Haû gi, Ngò, yhangmoq é íchyí îwâ pé lé loq eq zui mù, Egutuq ming mai shuì htoq lo é hkûn, yhangmoq eq tô tô é dangshikaq su dut râ a nghut. Haí mù gâ le, yhangmoq gi, Ngá é dangshikaq lé a xoq cháng kô é nghut mù,
Ngò gi, yhangmoq chyáng mai lhing ló byuq é nghut lhê ga haû Yhumsing taí pyo ri.

10 Shî gi, ahkyíng haû lai é htâng má, Israelaq é yhumbyù wuì eq Ngò to râ nghut é dang-shikaq nghut lhê ga haû Yhumsîng taí pyo ri.

Ngò gi, Ngá é tarâ pé lé, yhangmoq é i-myt má kat byi mù, yhangmoq é myit nhiklhum má kê to byi râ nghut lhê.

Ngò gi, yhangmoq é Garai Gasang nghut mù, yhangmoq gi, Ngá é byu pé dut kó râ nghut lhê.

11 'Haû Yhumsîng lé sé keq.' ga, yhâng é gumang hpó lé nghut nghut,

yhâng é chyangnâm mâ é sù lé nghut nghut, mhoqshit é byù nyi râ a nghut lo,

haî mù gâ lé, yhangmoq lhunglhâng bang gi, tiq htáng sù mai kê htáng sù jé shoq Ngo lé sé kó râ nghut lhê.

12 Hkâsu mù gâ le, Ngò gi, yhangmoq é agè ashop hkyô lé mara hkyut pyâm byi mù, yhangmoq é mara pé lé dum a bun byi lo râ nghut lhê."☆

gâ ri.

13 Dangshikaq haû lé, Yhang "asik" gâ é gi, sânghî lhum lé, axau kut pyâm é nghut ri; xau lô byuq é haî le, hkâ-myháng a myáng má byuq lô byuq râ nghut lhê.

9

Myidàm Saksé Zúm Má Noqkuq É Hkyô

1 Sânghî lhê é dangshikaq gi, noqkuq râ htûngtarâ pé eq noqkuq râ myidàm sân-yúng dik gok bo é nghut ri.

² Saî tô é saksé zúm é sâng-hi gok má gi, haû myibung tsûng jang, siboî eq haû nhông byî é muk joq mù, haû gok lé gi, Chyoiyúng Jowò ga myhîng ri.

³ Í dang nghû râ gok pán-gyang é ahkaû mâ é gok lé gi, Chyoiyúng Htâng é Jowò gâ é nghut lhê.

⁴ Gok haû má gi, namngón jung nyhê é hîng hkungga gyap eq hîng shup dangshikaq sidek joq ri. Dangshikaq sidek haû má gi, mannaq muk bo é hîng yam, ahaq nyún tô é, Arun é dumbáng eq, dangshikaq luqlong pé bo tô ri.

⁵ Dangshikaq sidek é ahtoq má gi, shîhtaí gunglik hkungga byi jang htoq má wup tô é, Hpungwup shingkang bò Sû é hkerubim* pé joq tô ri. Nghut kôlhang, ngamoq gi, ahkuî haû pé lé jîhkúm nuqguq a wó taî san kyo é nghut lhê.

⁶ Haû đông jung hkanmó ban lajang tô é hkûn, hkyangjông pé gi, ayang sâng-hi gok má wàng mù, yhangmoq é dojaú muzó lé wùn waq bekô nghut ri.

⁷ Nghut kôlhang, ahkaû gok má gi, hkyangjong mó za, yhânggùng é matú le, a sê é za byu pé kut shut é marâ é matú le, nhông byi râ sui chûng mù, razàn má radàm za wang é nghut lhê.

⁸ Haû Chyoiyúng Woi-nyí gi, haû pé đông mai, sâng-hi é saksé zúm ru joq nyi nyi, haû Chyoiyúng Htâng é Jowò wàng hkyô a hpông shit shi é lé, tân shit nyi ri.

⁹ Haû gi, ipyat shi é matú tân shit é azòng nghut mù, nhông byi é chyunghuq pé eq shigu hkungga

* **9:5 Hkerubim** gâ é gi, byù su su, dusak su su dut é, dùng dap é maumang lagyo ráhú nghut lhê.

pé gi, dojaú sũ é i-myt lé a wó lhoq sân-yúng byí é hkyô lé taí nau é nghut lhê.

¹⁰ Haú pé gi, zojung, shugjung eq châ san châ séng hking ahú hú eq za sêng é nghut mù, htûngli asik, lé joq é ahkyíng jé shoq za tô tô é gungsho eq sêng é tarâ pé nghut ri.

Hkrisduq É Sui

¹¹ Hkrisduq gi, shî má joq to gù nghut é gè hkyô pê é hkyangjong mó đông lé jé é hkûn, hpan tô é má a lom nghũ nau é, byu èq saí é a nghut é, je kô é eq je gumjup é saksé zúm mai wang lai bê nghut lhê.

¹² Yhang gi, Chyoiyúng Htâng é Jowò má wang é hkûn, bainám eq nojùng zo pê é sui lé chùng mù wang é a nghut é za, Yhâng é suí èq yhang banshoq é matú radâm za ahtum abyuq é hkyi yù hkyô wó yù bê nghut ri.

¹³ Htûngli đông agot a-û dut é bang lé lhoq sân-yúng râ matú, bainám eq nohtó zo pê é sui eq no-pyâ é myi-mhop lé, yhangmoq é ahtoq má hpyun gyun é hkûn, yhangmoq gi, ahtoq gungsho pyâm wó lhoq sansêng é hui kô é nghut lhê.

¹⁴ Haù nghut jáng, Garai Gasâng é hí má ra a bo é Yhânggùng lé, ahtum abyuq é Woi-nyí đông mai nhông byí é Hkrisduq é sui gi, rû dui nyi é Garai Gasang lé nga-nhúng wó dojaú sháng gaq ga, shi é hkyô shut shuî jé é nyi yap sâmlai mai nga-nhúng é myit sôn sê é hkyô lé, je riyhang wó lhoq sanséng yu ri-nhung mhaí!

¹⁵ Haù nghut é yanmai, Hkrisduq gi, danggidiq byi tô é ahtum abyuq é muizè lé, ji yù huí é bang wó hap yù kó sháng gaq ga, dangshikaq asik é gyoro sô xoq byi sũ nghut nyi ri. Haù su wó kut

é gi, sâng-hi lê é dangshikaq ahkaû má mara kut shut é bang lé lhoq lhut yû râ matú, yubak chýn xap zê ralhú dông, Yhang shî hkám byi yanmai nghut rì.

¹⁶ Madat dang eq séng luí ga jang, madat dang taí sù haû shî bê hkyô saksé shít râ lê.

¹⁷ Haí mù gâ le, madat dang gi, rayuq yuq shí jáng za sheq lichyúm htoq é nghut lê. Madat dang taí sù rû dui nyì nyì, haû gi, hkâ-nhám le lichyúm htoq râ a nghut.

¹⁸ Haû nghut é yanmai, sâng-hi lê é dangshikaq lháng gi, sui a bo lóm jáng lichyúm a htoq é nghut lê.

¹⁹ Mosheq gi, haû jep é tarâ má bo é hkunmó hkangmó lé, shiwa byù banshoq bang lé ban taí pyo é hkûn, zam zam ne é saumaú eq jâm kyâng lé yù mù, nojûng zô é sui eq bainám sui eq wuì nyhô tô é lé, chýúmding má le, shiwa byù banshoq bang lé le, hpyun gyûn é nghut rì.

²⁰ Yhang gi, "Sui shî gi, nungmoq cháng râ matú, Garai Gasang, hkunmó hkyô to bê nghut é, dangshikaq tô tô é sui nghut lê."☆ ga taí rì.

²¹ Yhang gi, saksé zúm eq dojaú é má chung é zè pé má le, haû eq rajung za sui haû hpyûn gyûn rì.

²² Gè gè gi, haû jep é tarâ má bo é dông ga jang, azíng zê aluq banshoq gi, suí eq lhoq sân-yúng é hui râ dut é nghut mù, sui htoq hkyô a joq jáng, mara hkyut byi hkyô le joq é a nghut.

²³ Haû mù, mauhkûng zè pé é azòng pé gi, hkungga haû pé eq lhoq sân-yúng é hui râ é nghut lê. Nghut kôlhang, mauhkûng zè pé yhang gi, haû

pê htoq je ge é hkungga pê èq lhoq sân-yúng é hui râ dut é nghut lê.

²⁴ Hkâsu mù gâ le, akying lhum é azòng za nghut é, byu èq sai é chyoiyúng dik é jowò má Hkrisduq wang é a nghut é za, Yhang gi, mauhkùng má yhang wang é nghut mù, ahkuî gi, nga-nhùng é matú Garai Gasâng é hí má bo yap byî nyi é nghut lê.

²⁵ Yhang gi, haû hkyangjong mó mai yhumsîng é sui a nghut é sui lé chùng mù, Chyoiyúng Htâng é Jowò má zàn wuî wàng luî kut é su, yhanggùng lé dum không byi byi kut râ matú mauhkùng má wang é le a nghut.

²⁶ Haû đông ru nghut le gi, Hkrisduq gi, mau htoq xâng hkun mai shî hkâm é adàm myo myo nghut berâ nghut lê. Nghut kôlhang, ahkuî, Yhang gi, yubak mara huî sêng pyám byi râ matú, yhanggùng lé hkungga không byi râ ga ipyat pé ló htâng ló nyi é má, banshoq é matú radàm za htoq shit bê nghut ri.

²⁷ Byù gi, radá za shî râ nghut mù, hau htâng má tarâ jéyáng é hui râ nghut é eq rajung za,

²⁸ Hkrisduq gi, byù myo myô é yubak mara lé yu pyám byi râ matú, radá za hkungga không é hui bê nghut ri. Haû mù, Yhang gi, yubak mara wun pyám byi râ a nghut lo é za, Yhang lé lánng nyi é bang lé hkyi yù hkyô yu lé byi râ matú, htâng má í dâm ngû râ dàm htoq shit râ nghut lê.

10

Hkrisduq É Gùng Lé, Banshoq É Matú Radàm Za Không Byî É Hkyô

¹ Haû jep é tarâ gi, jé lô râ nghut é gè hkyô pê é akyîng a nghut é za, wupzo za nghut ri. Haû nghut é yanmai, jep é tarâ gi, zàn wuì ru nhông byi byi kut nyi é eq rajung zâ é shigu hkungga pé đông mai, noqkuq râ matú chyâng lé é bang lé hkâ-nhám lé wó lhoq gumjup é a nghut.

² Tarâ haû wó lhoq gumjup byi é ru nghut le gi, yhangmoq nhông byi é hkyô nô pyám kó râ a nghut lhi? Hkâsu mù gâ le, haû noqkuq é bang gi, banshoq é matú radàm za lhoq sanséng huì é nghut jáng, yhangmoq é yubak marâ é matú, hkâ-nhám le mara a bô bun lo kó râ nghut lhi.

³ Nghut kôlhang, shigu hkungga haú pé gi, zàn wuì yubak mara pé lé lhoq pun byi é zè nghut ri.

⁴ Haû mù gâ le, nohtó pé eq bainám pê é sui gi, yubak mara lé huì sêng pyâm é hkyô wó dut é a nghut.

⁵ Haû mù luì, Hkrisduq, mingkan má lé jé é hkûn, Yhang taí é gi,

"Shigu hkungga eq hkungga lé Nàng a o é nghut mù,
Nàng kúm gi, Ngá é matú gungdu hen to byi bê nghut ri.

⁶ Myi nyhé hkungga pé eq mara hkyut hkungga pé gi, Nang lé gabú nhang é a nghut.

⁷ Hau htâng, Ngò gi, 'Garai Gasang ê, Ngò eq séng luì chyúmding má kê tô é eq rajung za,
Nàng ô nau é hkyô kut râ matú, Ngò, shi má nyi lhi.' nghu taí é."☆
gâ ri.

8 Sâng-hi má, Yhang gi, "Shigu hkungga eq hkungga pé, myi nyhé hkungga eq mara hkyut hkungga pé lé, Nàng a o é htoq agó, haú pé lé Nàng a gabú é nghut lhê." ga taí ri. Haú jep é tarâ đông haú pé lé kut râ dut kôlhang taí é nghut ri.

9 Hau htâng má, Yhang gi, "Nàng ô nau é hkyô kut râ matú, Ngò, shî má nyi lhê." ga taí ri. Haú gi, Yhang, htang lhum dangshikaq lé htaí masat to râ matú, sâng-hi lhum lé tô pyâm é nghut ri.

10 Myit ô nàu hkyô hau é yanmai, Yesuq Hkrisduq, Yhâng é gungdu lé hkungga đông banshoq é matú radàm za nhông byi é đông mai, nga-nhúng gi, lhoq chyoiyúng é hui bê nghut ri.

11 Hkyangjong hkangmó gi, nyí nyí bui bui, yap mù, yhâng é hkyangjong muzó lé zui saí é nghut lhê. Yhang gi, yubak mara lé hkâ-nhám lhang a wó huí séng pyám byi é, rajung zâ é shigu hkungga lé, dum nhông byi byi kut é nghut lhê.

12 Nghut kôlhang, hkyangjong mó nghut é Hkrisduq gi, yubak mara hkyut byi râ hkungga ralhum lé za, ahkyíng banshoq é matú ban nhông byi é hkûn jáng, Garai Gasâng é loqyo hkyam shut zung to bê nghut ri.

13 Haú hkûn mai, Yhang gi, Yhâng é gye pé lé, Yhâng é hkyi nang jang kut byi râ lé lánng nyi é nghut ri.

14 Haí mù gâ le, Yhang gi, lhoq chyoiyúng é huí nyi bang lé, hkungga ralhum eq za, pyat dedû é matú lhoq gumjup byi bê nghut ri.

15 Haú Chyoiyúng Woi-nyí le, haú hkyô eq séng luí nga-nhúng lé saksé hkâm kyô ri. Sâng-hi má, Yhang taí é gi,

16 "Haú Yhumsîng taí ri, shî gi, ahkyíng haú lai

htâng má, Ngò, yhangmoq eq to râ dang-shikaq nghut lê.

Ngò gi, Ngá é tarâ pé lé, yhangmoq é myit nhikl-hum hkaû má kat byi mù, yhangmoq é i-myit má kê to byi râ nghut lê."☆

gâ ri.

¹⁷ Hau htâng, Yhang taî jat é gi,

"Ngò gi, yhangmoq é yubak mara pé eq tarâ a chung é muzó pé lé, bûn lô râ a nghut."☆

gâ ri.

¹⁸ Haû mù, mara haû pé lé hkyut pyám byi bê nghut jáng, yubak marâ é matú hai hkungga le a ra lo nghut ri.

Hkam Jan Râ Hkyô

¹⁹ Haû mù luî, gumang wuì ê, nga-nhúng gi, Yesuq é suí eq, haû Chyoíyúng Htâng é Jowò má wàng râ matú hkyak wó lum to bê nghut lê.

²⁰ Haû gi, Yesuq é gungdu nghut é pán-gyang đông mai, nga-nhúng é matú hpóng byi bê nghut é asik eq rû dui nyi é hkyô nghut lê.

²¹ Haû nghut é yanmai le, Garai Gasâng é yhûm lé up é gyaú é hkyangjong lé nga-nhúng wó é yanmai le,

²² nga-nhúng gi, gingtîng é lumjîng hkyô mai sansêng é i-myit eq, Garai Gasâng chyáng ê mù, mara bò bûn é myit sôn sê é hkyô mai, nga-nhúng lé lhoq sanséng râ matú nga-nhúng é i-myit lé hpyun gyûn é hui nhâng luî, nga-nhúng é gungdu gi, sân-yúng wuì eq chi byî é hui yù sháng.

23 Nga-nhúng gi, nga-nhúng yín yu é myit my-oqbyù hkyô lé zuí gingtîng nyî sháng; hkâsu mù gà le, danggidiq byî to bê Sû gi, lhumzui Sû nghut lhê.

24 Chyitdap hkyô eq ge é muzó pé má, nga-nhúng gi, rayuq eq rayuq hkâsu kut myit nhaù toq byî lhum râ hkyô lé, dat myit nyî sháng.

25 Chôm huí zup lhûm nyî é hkyô lé, ra-am lhaq tô pyâm nyî kô é su, nga-nhúng gi, a tô pyâm é za, haù Buinyî chyâng lò bê nghut é lé nungmoq sê é eq rajung za, rayuq eq rayuq je riyhang myit wum byî lhûm nyî sháng.

26 Nga-nhúng gi, tengmán hkyô lé sê yu é htâng má, shi-ngé ngé mara dum kut shut shut kut é nghut jáng, mara hkyut byî râ hkungga a joq lo.

27 Tarâ jéyáng hkyô eq Garai Gasâng é gyê pé lé nyhê hkyô pyám râ nghut é nhikmo-yô é myi lé za, gyuq chiq myit mai lánq nyî râ dut bê nghut lhê.

28 Mosheq é tarâ lé he-ngik é sù ó yuq le, saksé í sum yuq é dâng é yanmai, shogyo nhikmyin a huí é za sat pyâm é hui bê nghut lhê.

29 Haù jáng, Garai Gasâng é Yhangzo lé hkyiwa ô má nâng pyeq bê sù, yhumsîng lé lhoq sân-yúng byî bê nghut é dangshikaq é sui lé a chyoíyúng é zê dông kut pyám bê sù eq, jeju byî é Woi-nyî lé rhoi é sù gi, hkâ-í yhang gyaù é mara dam byî é hui gîng râ nghut lhê nghû, nungmoq wó myit akô lú?

30 Hkâsu mù gà le, "Lató hpuq râ gi, Ngò ru nghut lhê; Ngò lató hpuq râ."☆ ga le, "Haù Yhumsîng gi, Yhâng é byu pé lé tarâ jéyáng râ nghut lhê."☆ ga le, tai é Sù lé, nga-nhúng sê lhê.

³¹ Haû rû dui nyi sù Garai Gasâng é loq hkaû má byit gyó wang é gi, gyuq chiq jung yhang nghut ri.

³² Nungmoq, haû maubó lé hap yu é* htâng, wuîhke jamjau huí é má gyai yhang shikut kôluí wó jân pyám bê nghut é, hí lhê buinyi pé lé myit bun keq.

³³ Ra-u u má, nungmoq gi, byu pê hí má de de rhoi shit é eq zing-rî é hui zo bekô nghut ri; ra-u u má, nungmoq gi, haû su hui zo bang eq rahá bo hui zo bekô nghut ri.

³⁴ Nungmoq yhang, je ge é eq ru gîng nyi é zè pé wó é lé sé kô é yanmai, nungmoq gi, htóng lúng bang lé shogyo nhikmyin bekô eq, nungmoq é sutzè pé lé sing yu pyám byí é bang lé, gabú myit eq jân pyám bekô nghut ri.

³⁵ Haû mù luí, nungmoq é hkyak myit lum tô é hkyô lé hkâdú pyám kó; agùn agó chyunghuq shigyaú é hui kó râ nghut lhê.

³⁶ Nungmoq gi, Garai Gasâng é ô naù hkyô lé kut é hkûn, Yhâng danggidiq byi tô é lé wó hap yù râ matú, nungmoq hkam jan râ dut é nghut lhê.

³⁷ Hkâsu mù gâ le, razup zo nghut jáng,
"Haû lé lô râ Sû gi, jé lé râ nghut mù, ahkyíng lhoq myáng râ a nghut.

³⁸ Nghut kôlhang, Ngá é dîngmán sù gi, lumjîng myit mai asak duì râ nghut lhê.

Yhang nungzut zut é nghut le gi, Ngò, Yhang lé myit nguì râ a nghut."✧
ga tô ri.

* **10:32** *Haû maubó lé hap yu é gâ é gi, gabú danglù lé sâng-hi wó hap yu é lé gâ lhê.* ✧ **10:38** Hbk 2:3-4

³⁹ Nghut kôlhang, nga-nhúng gi, nungzut zut mù htên byoq huí é bang a nghut é za, lumjínng mù hkyi yù huí é bang ru nghut lhê.

11

Lumjínng Myit Mai

¹ Lumjínng myit nghu é gi, nga-nhúng myit my-oqbyu tô é lé hkyak wó râ nghu é eq nga-nhúng a myàng shí é lé joq lhê nghu hkyak sê é hkyô nghut lhê.

² A-nham lhê bang gi, lumjínng myit haû mai Garaî eq owaq é hui kô é nghut lhê.

³ Lumjínng myit mai, nga-nhúng gi, nyi mi-nyi, joq mijoq lunglhang lé Garaî Gasâng é hkunmó eq hpan tô é hkyô sê gyô é nghut lhê. Haû mù, myoq eq wó myang é pé gi, byu-myang é pé mai saî htoq tô é a nghut.

⁴ Lumjínng myit mai, Abelaq gi, Ka-in kut é htoq je ge é hkungga, Garaî Gasang lé nhông byí é nghut ri. Lumjínng myit mai, yhang gi, yhang é hkungga eq séng luí Garaî Gasang hkya-ôn é hkûn, dingmán sù rayuq đông owaq é hui bê nghut ri. Haû mù, lumjínng myit mai, yhang gi, shi byuq bê nghut kôlhang, dang rû nyo nyi ashí nghut lhê.

⁵ Lumjínng myit mai, Eruk gi, shi é a hui zo shoq, asak shí mai mauhkûng shut shuî yu é hui bê. Yhang lé, Garaî Gasang shuî ló byuq bê nghut é yanmai, yhang lé a wó myâng lo nghut ri. Hkâsu mù gâ le, yhang gi, shuî yu é a hui shí é hí má, Garaî Gasang lé nguî nhâng sù rayuq đông owaq é hui sù nghut ri.

⁶ Lumjǐng myit a bo é nghut le gi, Garai Gasang lé a wó nguú nhang é nghut lhê. Haî mù gâ le, Yhâng chyáng shikut luí lé jé é sù gi, Yhang nyi é hkyô lé le, lhumzui myit mai Yhang lé hô bang lé, Yhâng èq shigyaú é lé le, lumjǐng râ dut é nghut lhê.

⁷ Lumjǐng myit mai, Noaq gi, a myang wú shí é hkyô pé eq séng luí sidiq byi huí é hkûn, yhâng é yhumbyù wuì lé hkyî râ matú, gyuq hkunggâ é đông mai wuì-sanghpo saí bê nghut ri. Yhâng é lumjǐng myit mai, mingkan lé mara byi é nghut mù, lumjǐng myit mai lo é dingmán hkyo é jeju lé hkam yù sù dut bê nghut ri.

⁸ Lumjǐng myit mai, Abraham gi, yhâng é muizè đông, htâng má yhang hap yù râ nghut é, Garai Gasang byi é jowò shut e ló râ matú ji yu é huí é hkûn, jìno gyo mù, yhang hká shut e ló é a sé kôlhang, ê bê nghut ri.

⁹ Lumjǐng myit mai, yhang gi, gó ming má nyi é byù bíng rayuq su, danggidiq byi tô é mau má nyi bê nghut ri. Yhang gi, zúm pé má lúng é nghut mù, rajung zâ é danggidiq é muizè lé hkam yu é Isak eq Yakup le, zúm pé má lúng bekô nghut ri.

¹⁰ Hkâsu mù gâ le, Abraham gi, Garai Gasâng èq azòng hên mù saí tô é, gîng é apûn awang pé eq mu é myuq lé myit myoqbyu nyi é nghut ri.

¹¹ Lumjǐng myit mai, Abraham gi, yhâng é asak ipyat lai ló byuq é eq, Sarah le baùdung nghut to kôlhang, haû danggidiq byi Sù, lhumzui sù nghut lhê ga myit sôn yu é yanmai, îwa rayuq wó dut é hui bê nghut ri.

¹² Haû mù luí, yhang gi, shí gùng đông nghut kôle, yhang rayuq mai lo é awut ashín pé gi, mauhkûng

mâ é kyî pé eq wuimau yàm mâ é a ung nghap é semuî myhó myô lò bê nghut ri.

¹³ Byù haú bang banshoq gi, yhangmoq shi é hkûn jé shoq lumjîng myit mai asak dui nyi kô é nghut lê. Yhangmoq gi, danggidiq byi tô é pé lé a hap yù kó nghut ri; nghut kôlhang, haú pé lé myàng za myàng kômù, we mai te yu akô. Yhangmoq gi, myidàm htoq má gó ming byu pé eq byù bíng pé nghut é lé yín yû bekô nghut ri.

¹⁴ Haû su yín yu é byu pé gi, yhangmoq yhum-sing é ming lé ho nyi é bang nghut é lé tân shit é nghut akô.

¹⁵ Yhangmoq htoq lo é ming lé, yhangmoq myit tui nyi kô é ru nghut le gi, dum tau ló râ ahkáng wó kó râ nghut lê.

¹⁶ Ahkuî kúm, yhangmoq gi, je ge é ming nghut é, mauhkûng mingdán lé myit tuî nyi akô nghut ri. Haû mù luî, Garai Gasang gi, yhangmoq é Garai Gasang nghu é hui râ lé a hoq é nghut lê. Hkâsu mù gâ le, Yhang gi, yhangmoq é matú myuq ralhum lajâng to byi bê yanmai nghut ri.

¹⁷ Lumjîng myit mai, Abraham gi, Garai Gasâng èq yhang lé chyam é hkûn, Isak lé hkungga ralhum đông không byi bê nghut ri. Haû gi, danggidiq pé lé hap yu to bê sù gi, yhang é yuqzo zote lé không byi râ dâ é nghut lê.

¹⁸ Garai Gasang gi, "Isak đông mai lo é lé, náng é awut ashín nghu sôn byi râ nghut lê."✧ ga yhang lé danggidiq byi to bê nghut kôle, yhang haû su kut é nghut ri.

¹⁹ Abraham gi, shi é mai Garai Gasang wó lhoq dui toq lhê ga myit yu ri. Taí sháng ga jáng, Isak lé, shi byuq bê mai, yhang dum wó hap yu é nghut ri.

²⁰ Lumjín myit mai, Isak gi, Yakup eq Eso nhik é htâgnùng lhê é matú, shimân byi bê nghut ri.

²¹ Lumjín myit mai, Yakup gi, yhang shi ló râ u má, Yosep é yhangzô nhik lé shimân byi mù, yhang é dumbáng-u má ngè luí, noqkuq bê nghut ri.

²² Lumjín myit mai, Yosep gi, yhang asak htûm ló râ u lé, Israelaq byu pé Egutuq ming mai htoq lò râ eq séng luí táí mù, yhang é showui pé eq séng luí hkâsu kut râ hkyô lé pying to bê nghut ri.

²³ Lumjín myit mai, Mosheq é yhângnu eq yhângwâ nhik gi, yhang hku lé é htâng má, yhang lé lhamó sum hkyap haq to bekô nghut ri. Haí mù gâ le, yhangnhik gi, zoshâng haû yúng é myàng kômù, hkohkam é mungdang lé a gyuq kó nghut ri.*

²⁴ Lumjín myit mai, Mosheq gi, yhang kô lo é hkûn, Hpara-uq é byizô é yhangzo ga râ lé he-ngik pyâm ri.

²⁵ Yhang gi, yubak marâ é ngón hkyô má rayoq zo ngón kún râ malaí Garai Gasâng é byu pé eq rahá hpuzô é hui râ lé sheq hkyin yù bê nghut ri.

²⁶ Yhang gi, haû Hkrisduq é matú rhoi huí é lé, Egutuq ming mâ é sutzè htoq má je riyhang hpaudap lhê ga myit sôn yu ri. Haí mù gâ le, yhang gi, yhang é shigyaú chyunghuq lé myit myoqbyu nyi sù nghut ri.

²⁷ Lumjín myit mai, yhang gi, hkohkâm hpó nhikjum yô é lé a gyuq é za, Egutuq ming mai htoq

* **11:23** Haû-u lé, hkohkâm hpó gi, Israelaq pê é yuqzo zonú wui lé sat pyám râ hkunmó hkyô tô é nghut lhê.

lô byuq bê nghut ri. Yhang gi, myoq èq a wó myang é sũ Garai lé wó myang é sũ đông, hkam jân é nghut ri.

²⁸ Lumjínng myit mai, yhang gi, haû zomún lé sat é maumang lagyô èq Israelaq byu pé é zomún lé a wó záng sháng gaq ga, Lhoqlhai Poî eq sui hpyûn é hkyô le kut hî bê nghut ri.

²⁹ Lumjínng myit mai, haû shiwa byu pé gi, Nhões Nè lé kyuq huí é myigùng htoq mai su lai byit bekô nghut ri; nghut kôlhang, Egutuq byu pé le, haû đông lai shikut wú kô é hkûn, yhangmoq gi, myup shi byuq bekô nghut ri.

³⁰ Lumjínng myit mai, shiwa byu pé, Yeriho myuq xêwâm lé nyhit nyí sô lhing é htâng má, xêwâm haû leq gyop byuq bê nghut ri.

³¹ Lumjínng myit mai, shiwa myhí Rahap gi, haû Israelaq jó wú bang lé nguingón é eq lhom hkulum yu é yanmai, jîno a gyo bang eq rahá sat pyâm é a huí é nghut lhê.

³² Haû htoq lai lui, ngò haî tai jat ra shirâ lhu? Gidon, Barak, Samson, Yephtha, Dawiq, Samuelaq pé eq myiqhtoî pé é hkyô lé tai râ ahkyíng ngò a wó.

³³ Haû bang gi, lumjínng myit mai mingdán pé lé wó zân ung yû bekô, tengmán hkyô lé chung jai bekô, danggidiq byî to bê lé wó hap yû bekô, hkanghkyi pé é nhut lé wó myhî pyâm bekô,

³⁴ myiduq myishâm lé wó sat pyâm bekô, shamsó mai le wó hpang lut bekô nghut ri. Yhangmoq é wum nyhóm hkyô gi, wum taû bo byuq é dut bekô nghut ri. Yhangmoq gi, majan má a-tsam mó bò bang dut mù, maigan gyè pé lé wó ung pyâm kô é nghut lhê.

³⁵ Myiwe wuì gi, yhangmoq eq sêng é shi byuq bê bang asak dum lhoq tuì huì é lé, wó yù bekô nghut ri. Góbang gi, je ge é dui toq hkyô wó yù kó sháng gaq ga, lhoq lhut é hui râ lé he-ngik pyâm kômù, zing-rî é gyai yhang hui zo bekô nghut ri.

³⁶ Ra-am gi, wuìzuì kut pyâm byî é eq nhuq bat é hui bekô, góbang gi, shamtoq kyum hut huì é eq htóng lhung é hui bekô nghut ri.

³⁷ Yhangmoq gi, luqgok eq dú sat é, í túm dut shoq yik hpyit é, sham èq sat pyâm é hui bekô nghut ri. Yhangmoq gi, sau-kuq eq bainám-kuq wut mù, htot lhing wún luì, myung kyuq é, zing-rî é eq rhoi pyâm é hui bekô nghut ri.

³⁸ Yhangmoq lhumzuì nyì kô é yanmai, mingkan gi, yhangmoq eq a gingdán nghut ri. Yhangmoq gi, yoso pé má, bùm pé má, luqghyung pé eq myìdong pé má nyi lhing wún bekô nghut ri.

³⁹ Haú bang banshoq gi, yhangmoq é lumjǵng myit é yanmai, owaq é hui bê nghut kôle, yhangmoq ó yuq le, danggidìq byî tô é lé a myang hkam yù kó nghut ri.

⁴⁰ Haí mù gâ le, nga-nhung eq rahá za nghut jǵng sheq, yhangmoq lhoq gumjup é wó hui kó sháng gaq ga, Garai Gasang gi, nga-nhung é matú je ge é hkyô lajǵng to byi bê nghut ri.

12

Garai Gasang, Zo Wuì Lé Mhoqshit É Hkyô

¹ Haú mù luì, nga-nhung gi, haú myhò é saksé pé mhutdúm su nga-nhung é lǵnghkyuq má joq to bê nghut é yanmai, nga-nhung lé hkâm tang é hkyô pé jung hkangmó eq, luì za lhoq nhung byî é yubak

mara lé dú pyám mù, nga-nhúng dìn rã matú tô tô é hkyô lé, hkam jan luí dìn e ló sháng.

² Nga-nhúng gì, nga-nhúng é lumjǐng hkyo é apûn awang lé hĩ sũ eq lhoq gumjup byĩ sũ nghut é Yesuq lé wũ tsuq nyĩ sháng. Yhang gì, Yhâng é hí má joq tô é gabú hkyo é yanmai, hoq hpũ é hkyô lé haĩ su a ngam é za, tapzǐng má shĩ hkâm é hkyô lé jãn pyám luĩ, Garai Gasâng é hkohkâm-tanghkuq é loqyo hkyam shut zung to bê nghut ri.

³ Nungmoq gì, a ngũ byuq rã eq myit wum a gyuĩ byuq kó sháng gaq, yubak dap bâng chyáng mai haũ su htuq htǐng é hkyô lé jãn pyâm é Yesuq chyáng mai myit wum yũ keq.

⁴ Nungmoq gì, yubak mara lé htuq htǐng shikut é hkyô má, nungmoq é sui shun pyám shoq yhang a kut shĩ kó nghut ri.

⁵ Hau htoq agó, nungmoq gì, zo wuĩ lé đông Garai Gasang nungmoq lé wum byĩ é dang lé tô-myhĩ pyám bekô lú? Wum byĩ dang haũ gì, "Ngá zo ê, haũ Yhumsǐng mhoqshit é hkyô lé agya alhã hkâkut pyám,

Yhang, nang lé tân é hkũn, myit wum hkâgyui,

⁶ haĩ mù gã le, haũ Yhumsǐng gì, Yhang chyitdap é bang lé mhoqshit mù, zo rayuq lé đông, Yhang hap yu é bang yuq hkangmó lé dam byĩ é nghut lhê."☆

gã é nghut ri.

⁷ Mhoqshit huĩ é hkyô má, wuĩhkê é lé hkam jan keq. Garai Gasang gì, nungmoq lé, zo wuĩ lé đông kut é ru nghut lhê. Hkâsu mù gã le, yhumsǐng é yhângwã èq a mhoq é zo gì, ó wã nyĩ lhê lú?

☆ 12:6 Sânghkyang 3:11-12

⁸ Nungmoq gi, yuq hkanqmó huí lai é mhoqshit hkyô lé, a huí kô é nghut jáng, dezô pé đông nghut byuq mù, zo sîng wui a nghut lo kó.

⁹ Nga-nhúng banshoq bang gi, nga-nhúng lé mhoqshit é xângzo íwâ pé wó é bang chyat nghut mù, yhangmoq lé hkanngâ é nghut lhê. Haû nghut jáng, je riyhang, nga-nhúng é woi-nyí eq sêng é Íwâ é a-ô má nyi mù, asak duì râ dut ri myhi-nhung!

¹⁰ Nga-nhúng é xângzo íwâ pé gi, yhangmoq je ge dik bûn é lé, nga-nhúng lé rayoq zo mhoqshit é nghut ri. Nghut kôlhang, Garai Gasang gi, Yhâng é chyoiyúng hkyô má nga-nhúng wó bo lôm shoq, nga-nhúng é gè hkyô é matú, nga-nhúng lé mhoqshit ri.

¹¹ Mhoqshit é hkyô hkanqmó gi, mhoqshit u lé ngón hkyô a nghut é za, nò hkâm hkyô nghut nyi ri. Nghut kôle, mhoqshit hkyô haû lé hkam yù bê bang é matú gi, htâng má, nguínón hkyô eq dîngmán hkyô é ashi lhoq htoq byi ri.

¹² Haû mù luí, myúng byuq é nungmoq é loq pé eq wum nyhôm byuq é nungmoq é hkyihput pé lé wum-o lhoq kîng keq.

¹³ Hkyi hten bang a wó sô é a dut shoq, lhoq gê byi é wó huí kó shâng gaq, nungmoq so râ matú, hkyô lhoq nyhang nyi keq.

Garai Lé He-ngik Bang Dàm Byi Hui Râ Hkyô

¹⁴ Byù banshoq bang eq nguínón shoq nyi râ eq chyoiyúng râ matú wó dut é í shikut keq. Hkâsu mù gâ le, ó yuq le, chyoiyúng hkyô a bo é gi, haû Yhumsîng lé myàng râ a nghut.

¹⁵ Ó yuq le, Garai Gasâng jeju lé a tô pyám râ matú, sidiq keq. Haû, yuq htoq lô mù, wuîhke hkyô

lhoq htoq é eq byù myo myo lé agot a-û dut nhang é nuì hko su, ó yuq lé le hkâdut nhâng kó.

¹⁶ Ó yuq le, ashop é đông gungsho zùm yap é hkyô nghut nghut, zangradún é matú, yhang wó tô é yuqzo zomún muizè ahko ahkáng lé ung zô pyâm é, Garai a lom é Eso su nghut nghut, a kut râ matú sidiq keq.

¹⁷ Nungmoq sê é eq rajung za, Eso gi, htâng má, shimân jeju haû lé hkam yù nau é hkûn, he-ngik pyâm é hui bê. Yhang gi, shimân jeju haû lé ngaubyi ngau-nhap èq hô kôlhang, yhang kut é hkyô lé a wó htaí byi lo nghut ri.

¹⁸ Nungmoq gi, wó záng é eq myi duq nyi é Sinaq Bùm má le, mauchut tuq é, noq-singkyi dut é eq laidun lo é má le,

¹⁹ tut htê mying é eq, dang taí htê mying é má le, a jé ê kó nghut ri. Dang htê haû lé wó gyô é bang gi, yhangmoq lé, dang a taí jat lo râ matú dung tôngbán akô nghut ri.

²⁰ Haî mù gâ le, yhangmoq gi, "Bùm haû má dusak pé záng jáng lháng, luqgok èq dú sat râ dut lhê."☆ ga Garai Gasang hkyô tô é hkunmó lé a wó hkâm kô é yanmai nghut ri.

²¹ Haû byu-myàng hkyô gi, lûm wú gyuq hpo dut é yanmai, Mosheq lháng gi, "Ngò, gyuq nán ri."☆ ga taí é nghut ri.

²² Nghut kôlhang, nungmoq gi, Zi-un Bùm eq rû dui nyi é Garai Gasang é myuq nghut é mauhkûng Yerusalem má, maumang lagyô pé ajùm ayò gabú ratung zup zîng é jang eq,

²³ mauhkûng htoq má myîng kê to huî é, zomún pê é noqkuq hpúng joq jang má, jé lé bekô nghut ri. Haû mù, nungmoq gi, byù banshoq é tarâ agyî nghut sù Garai Gasâng chyáng le, lhoq gumjup huî é dîngmán bâng é woi-nyí pê chyáng le,

²⁴ dangshikaq asik é gyoro so sù Yesuq chyáng le, Abelaq é sui htoq má je ge é danglù taî é, hpyûn gyûn é sui má le, jé lé é nghut bekô.*

²⁵ Nungmoq gi, dang nyô Sù lé a gyo a kut râ matú, sidiq keq. Myidàm htoq má sidiq byî é sù lé he-ngik pyâm é bang, a lut kê é nghut lê. Haû mù, mauhkûng mai nga-nhúng lé sidiq byî é Su chyáng mai, nga-nhúng lhing lô byuq é ru nghut le gi, je riyhang nga-nhúng a wó lut râ a nghut kó lhi?

²⁶ Haû Garaî dang taî é u má, Yhâng é htê gi, mingkan lé lhoq nhún kat ri, ahkuí kúm gi, "Ngò, mingkan lé za a nghut, mauhkûng pé lé le radàm dum lhoq nhún râ nghut lê."☆ ga Yhang dang-gidiq byî to bê nghut ri.

²⁷ "Radàm dum" gâ é dang gi, haû a wó lhoq nhún é pé wó myit to sháng gaq ga, hpan to huî é zè pé nghut é, wó lhoq nhún é pé lé huî sêng pyám râ lé gâ é nghut lê.

²⁸ Haû mù luî, nga-nhúng gi, a wó lhoq nhún é mingdán lé hap yu to bê nghut mù, jeju bun luî, hpautap é eq gyuq hkunggâ é myit mai Garai Gasang hap yù gíng é đông noqkuq sháng.

²⁹ Hkâsu mù gâ le, nga-nhúng é "Garai Gasang gi, nyhê jôm é myi nghut ri".☆

* **12:24** Abelaq lé gi, yangmang Ka-in èq sat é nghut luî, yhang é sui gi, lató-hpuq râ matú nghut ri; nghut kôlhag, Hkrisduq é sui kúm gi, hkyi yù hkyô lajang byî ri. ☆ **12:26** Hagi 2:6 ☆ **12:29** Tarâ Pun 4:24

13

Ló Htáng Má Lhoq Pun Kyîng Ê Hkyô

¹ Rayuq eq rayuq, gumang yhangchang đông chyitdap lhûm nyi keq.

² Byù bíng pé lé hkulûm râ hkâtô-myhí kó, hkâsu mù gâ le, ra-am gi, haû su kut nyi kô é yanmai, a sê é za maumang lagyô pé lé hkulum záng bekô nghut ri.

³ Nungmoq gi, htóng lúng bang eq rahá htóng lúng luzúm wuî đông, htóng lúng bang lé le, nungmoq yhang jamjau hui zô nyi é đông, hpuzô é bang lé le, myit bun keq.

⁴ Myiháng hkyô gi, lhunglhang bâng eq hpautap é hui râ dut é nghut mù, myiháng yhuphpú gi, sân-yúng râ dut lhê. Hkâsu mù gâ le, Garai Gasang gi, su-myi sulàng lú é bang eq ashop é đông gungsho zùm yap é bang banshoq lé jéyáng râ nghut lhê.

⁵ Nungmoq é asak duì hkyô má, ngùn lé chyitdap é myit tô pyám mù, nungmoq wó é lé nhik dik nyi keq, haî mù gâ le, Garai Gasang gi,

"Hkâ-nhám le, Ngò, nàng eq a gang râ; hkâ-nhám le, Ngò, nang lé a tô pyám râ."☆
ga taî é nghut lhê.

⁶ Haû mù, nga-nhúng gi, hkyak lum é myit mai, "Haû Yhumsîng gi, ngo lé garúm sô nghut lhê yanmai, ngò, gyuq râ a nghut. Ó yuq wá, ngo lé haî wó kut râ lú?"☆

ngô taî é nghut lhê.

⁷ Nungmoq lé Garai Gasâng é mungdang taî kyô é, nungmoq é hkyô-u shê bang lé, myit bun keq.

Yhangmoq asak htum shoq nyi lai lo é sâmlai lé myit wú mù, yhangmoq é lumjǐng myit lé alik kut yù keq.

⁸ Yesuq Hkrisduq gi, a-nyí nap, hkû-nyí, htângnùng pyat dedu rajung za nghut nyi ri.

⁹ Maú nhô zâ é mhoqshit hkyô ajung jung maí èq shuí nghoq huí é bang hkâdut kó. Zo bang lé hai akyû a byí é, htûngli zoshuq èq a nghut é za, Garaí jejú èq nga-nhûng é myit nhiklhum lé wum-o lhoq kǐng yu é gi, gè hkyô nghut lhê.

¹⁰ Nga-nhúng gi, saksé zúm má dojaú é hkyangjong pé zo râ ahkáng a wó é hkungga gyap ralhum wó é nghut lhê.

¹¹ Haú hkyangjong mó gi, dusak pê é sui lé, yubak mara hkungga đông Chyoiyúng Htâng é Jowò má yu wang ri; nghut kôlhang, gungsho pé lé gi, byù nyi jowò shinggan má nyhê hkyô pyâm ri.

¹² Haú eq rajung za, Yesuq le, Yhâng é sui đông mai byu pé lé wó lhoq chyoiyúng râ matú, myuq hkum shinggan má jamjau hpuzo mù shí hkám bê nghut ri.

¹³ Haú mù luí, nga-nhúng gi, byù nyi jowò shinggan má Yhâng chyáng ê mù, Yhang hui zô é rhoi hkyô lé ê bo hui zo sháng.

¹⁴ Hkâsu mù gâ le, nga-nhúng gi, mingkan shí má ru gǐng nyi é myuq wó bang a nghut é za, jé lé lô râ myuq lé ho nyi é bang ru nghut lhê.

¹⁵ Haú mù luí, nga-nhúng gi, Garaí Gasâng é myǐng lé yín yu é nhutwui é ashí nghut é, hkyá-on hkungga lé, Yesuq đông mai, Garaí Gasâng chyáng xoq xoq nhông byí nyi sháng.

16 Ge é hkyô kut râ eq góbang lé shuî gam chûng râ hkyô lé, hkâtô-myhí kó; hkâsu mù gà le, Garai Gasang gi, haû sù é hkungga pé lé ô ngui nyi ri.

17 Nungmoq é hkyô-u shê bang é jîno gyo mù, yhangmoq é ahko ahkáng ô má nyi keq. Yhangmoq gi, jihpán shit râ dut é bang đông mai nungmoq lé upzúng nyi é nghut lhê. Yhangmoq é muzó pé gi, nungmoq é matú akyû a bo é wôlai a dut é za, gabú hkyô ralhum wó dut sháng gaq, yhangmoq é jîno gyô nyi keq.

18 Ngamoq é matú kyûdung byi kó laq. Ngamoq gi, sân-yúng é myit sôn sê é hkyô wó mù, hkyô hkgámó má ge é đông asak duì râ lé ô nau lhê nghû, hkyak wó myit ri.

19 Ngò gi, nungmoq chyáng hân za wó dum jé sháng gaq, hau é matú je riyhang kyûdung byi keq nghû wum taî tsuq kat lhê.

20 Sau hpúng pé é sau zúng Sû mó nghut é, nga-nhûng é Yhumsîng Yesuq lé, haû ahtum abyuq é dangshikaq é sui đông, shî bê mai dum lhoq duì toq é sù, nguîngón hkyo é Garai Gasang gi,

21 Yhang ô nau é hkyô kut râ matú ge é hkyô jung hkgámó nungmoq lé lhoq gumjup byi mù, Yesuq Hkrisduq đông mai Yhang lé gabú nhang é hkyô lé, nga-nhûng chyáng kut nyî sháng gaq. Hpungwup shîngkang gi, Yesuq Hkrisduq chyáng pyat dedu ahtum abyuq ru joq nyî sháng gaq. Amen.

22 Gumang wuî ê, ngò lhoq pûn kyîng é dang lé nungmoq wó hkam jan kó sháng gaq nghû, wum taî tsuq kat lhê; hkâsu mù gà le, ngò gi, nungmoq lé, laiká ratot za kê kat é nghut lhê.

²³ Ngò gi, nga-nhùng é gumang Timohti lhoq lhut kat é hui bê hkyô lé, nungmoq lé sé nhâng nau ri. Yhang shî má myap jé lé é nghut le gi, ngò, yhang eq rahá nungmoq lé, lé hui râ nghut lhê.

²⁴ Nungmoq lé shuî-u bang banshoq eq Garai Gasâng é byu pé banshoq lé bo shi-kyám byi keq. Itali ming mâ é gumang wuì gi, nungmoq lé shi-kyâm kat akô nghut ri.

²⁵ Jeju gi, nungmoq banshoq bâng chyáng ru joq nyî sháng gaq ô.

Chyoiyúng chyumlaiká: dangshikaq asik; Zaiwa

New Testament in Zaiwa

copyright © 2009 Wycliffe Bible Translators, Inc.

Language: Zaiwa

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9781921445408

The New Testament

in Zaiwa

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses,

please contact the respective copyright owners.

2014-04-30

PDF generated using Haiola and XeLaTeX on 19 Dec 2025 from source files
dated 29 Jan 2022

23f9fc55-a8a4-59ef-9513-707ec336b0ee